



Xaverius Thaumaturgus, Panegyricum Poema

Frizon, Léonard

Burdigalae, 1684

Caput I. Iconum Pari primo respondens. Xaverius objecta sibi divinitus laborum gravißimorum specie exclamat, amplius. Tabul. I. Surrexit Elias Propheta quasi ignis, & verbum ipsius quasi facula ...

[urn:nbn:de:hbz:466:1-69047](#)



THEOLOGICORUM
HISTORICORUMQUE COMMENTARIOREM
CIRCA RES
D. FRANC. XAVERII
INDIARUM APOSTOLI
CAPUT I.

Iconum Pari primo respondens.

Xaverius objecta sibi divinitus laborum gravissi-
morum specie exclamat, amplius. Tabul. I.

Xaverius, deliciis affluens cœlestibus, identidem
succlamat, Satis est Domine. Tabul. II.

PARS CAPITIS PRIOR.

Surrexit Elias Propheta quasi ignis, & verbum
ipsius quasi facula ardebat. Eccli. XLVIII.

ET illa frequens in sacris litteris & idonea similitu-
do, quâ curandæ vindicandæque gloriæ Divinæ stu-
dium, seu zelus, ut appellari solet, æmulatioque
sancta cum igne comparatur. Deo optimo maximo, Dei
cœlestibus Administris, hominibus virtute præclaris, ea

X A V E R I U S T H A U M A T U R G U S.

tribuitur ac splendide congruit. *a* Etenim Deus noster, *ignis consumens est*: quod ait succinens Moi Paulus. & ipse crebro zeloten, emulatorem, honorisque sui vindicem acerrimum se Deus, tum imperiosis ac minacibus verbis, tum factis insignibus stupendisque testatur. Atque idem *b* facit Angelos suos, Spiritus, & Ministros suos flammarum ignis. Apostolos vero, mysticè Duces Juda vocatos à Zacharia, positurum se prænuntiat *c* sicut caminum ignis in lignis, & sicut facem ignis in feno: & devorabunt, inquit, ad dexteram & ad sinistram omnes populos.

Eiusmodi Franciscus Xaverius extitit, Nuntius pariter Apostolicus, Indiarumque Apostolus; morum integritate, virginitatis flore, perferendi Evangelii celeritate, illustri felicique in animarum salutem ministerio, verè Angelus, ac planè vir divinus, igneo Prophetæ Thaumaturgoque Eliæ quam-simillimus. Nihil igne acrius & actuosius; nihil Elia ferventius, & ad divini cultūs restitutionem vindictamque efficacius. *d* Zelo zelatus sum pro Domino Deo exercituum; ait egregiè sibi conscius, Deumque ipsum testem alloquens Propheta; & sanctissimi sempiternique Numinis amore simul, odioque conscelerorum incensus mortaliū. Quæ verborum faces vel impium Regem Achabum, vel paternæ superstitioni inharentem Ochoziam arguentis! Nec molliter Elisæus, tanto dignus magistro discipulus, egit cum Joram: parentum sacrilegia filio coram objecit: supplicis Regis expostulationem temerariam justa vehementique indignatione castigavit.

Quid Joannes, alter ille Elias? quam graviter in Proc̄erum Judæorum corruptelas exarsit! quam severa Herodem incestum nota censor castissimus inussit! Vocem, præente Isaiæ vaticinio, se ipse nominarat. O solidam, & vivam, & ardentem penitus claramque vocem, omnium audientia populorum, omnium prædicatione seculorum dignissimam! *e* Ille erat lucerna ardens & lucens, ex Verbi oraculo: atque ex Bernardi sententiâ, ardens erat

a Deuteron. 4.

Hebr. 12.

b Heb. 1.

Psal. 103.

c Cap. 12.

d III. Reg. 19.

e Ioan. 5.

in se ipso, vehementi austoritate conversationis; erga Christum intimo quodam & pleno fervore devotionis; erga peccantes proximos constantiam liberæ increpationis. Et Xaverius hunc triplicem ardorem ita conceperat, factisque expresserat, ut ipsum facile Joannem Baptistam dicturi fuerint, qui tali tantoque nomine Gasparem Barzæum, ex institutione Xaverii disciplinaque agentem, cohonestarunt Armuziani.

Atque ut ceteras illius ardoris partes hic omittam, aliis locis tractandas; mirum est profectò, quā liberè Franciscus Joannem Lusitanæ Regem, pium quamvis & beneficū, propagandæ tamen fidei securiorem aliquanto Principem, admoneat sui muneris; ac judicii supremi terrorem, ob aliena delicta labesque præfectorum & magistratum Indorum negligentius vindicatas, incutiat Apostolicis prorsus, & ignem divinum spirantibus epistolis. At verò mirabilior illa vis animi, quā cum alios, Indos Japoniosque Reges, tum vel maximè Amangucianum Regem, fœdissimæ libidinis mancipium, adeo fidenter in media ipsius aula barbarum objurgabat; ut socius, vir aliqui constans & apprimè religiosus, toto corpore perhorresceret, interpretatione emollire quidquam vetitus; atque ictum videlicet acinacis, ab irritato nunquam prius auditis & acerrimis criminibus tyranno, in singula verba expectaret. Unde convenienter, in principio sacrae de Xaverio liturgiæ, voces illas Ecclesia sancti Regis Vatisque usurpat. *Loquebar de testimonis tuis in conspectu Regum, & non confundebar.* Nam quid ego de illa spiritus vehementia dicam, quā Franciscus Præfecto Comorinensi, alterique Lusitano duci, Neophytes vexantibus, immanitatem exprobavit, minas intentavit? quid de illis concionum fulminibus: aut privata collocutione subiectis passim, & cuivis hominum generi, amoris divini facibus? Ubique homo igneus ignea verba loquebatur.

Verum hæc propria quasi vox ignis est à Xaverio edita,
AMPLIUS. Tria sunt insaturabilia, quæ Salomon in Proverbiis enumerat: *ignis verò nunquam dicit, sufficit.* Obvia quæque corripit; & proxima depastus, excurrit, tantò avidior; auctoque

THAUMATURGUS.

57

auctoque cum flammis impetu , longius in omnem partem, ubi suppetit materia , latiusque funditur. Ita Xaverius virtutem suam explicuit ; & inexplebile desiderium divinæ gloriæ , salutis animarum , accedit ; ipsaque exhortatione vehementius incitatum , ad fines usque terrarum rapidissimè protulit. Quem animum luculentè jam inde à principio testatus & professus est.

Cùm enim ^f autor fidei consummatorque JESUS , ad promulgandum gentibus & regibus Evangelium delecto Xaverio, perinde ac Paulo ^g ostendere vellet, quanta oporteret eum Domini Deique sui causa perpeti laborum & plurimorum & maximorum imaginem dormienti objecit , mystico præsagoque somnio adumbratam congestæ in fascem crucis innumeræ, ex omni periculorum ærumnarumque genere, sunt propositæ. Ac velut Paulo ^h in somnis obtulerat se species Macedonis , Apostolum ad opem suæ genti ferendam advocantis ; visus est sibi Franciscus Indum humeris gestare , cuius mole usqueod premeretur , ut onus monte Pyrenæo , patriæ suæ Navarræ imminentे, gravius sibi incumbere sentiret. At fortis excelsisque & palmaris animus , adeò non exterritus objectis difficultatibus , adeo non pondere imposito fractus est , aut impendentibus urgentibusque malis aliqua ex parte cessit ; ut erectior insurgeret , graviora appetentissimè flagrantissimeque provocaret. Occurrebant maria immensa, scopolis & naufragiis infamia ? amplius expetebat. Observabantur vastæ incultæque terræ , aliæ squalentibus arenis torridæ , aliæ pruina geluque rigidæ ? amplius exoptabat. Apparebant gentes , ipso vultu habituque toto barbaræ , cum Tartareis copiis in ejus exitium conjuratæ , saxa venenatasque sagittas in adversum dirigentes? parva illa tam ingenti animo videbantur : amplius, amplius requirebat.

Multas voces magnas , sed detestabiles in vitam humanam pervenisse , celebresque vulgo ferri , considerabat ⁱ Seneca philosophus ; nullam adhuc se vocem audisse

^f Hebr. 12. ^g Act. 9. ^h Ibid. 16. ⁱ De Clementia l. 2.

X A V E R I U S

⁵⁸ ex bono lenique animosam. Sed fuerit ista sanè profa-
nos inter homines bonitatis & lenitatis infantia: cre-
bras quidem, & magnifica:, plenaque animorum, à Chri-
stianis, bonitate & lenitate præstantibus viris profectas
voces accepimus; nullam verò animosiorem, quam Xaveria-
nam, *amplius*. Hoc est; mihi malorum ista, quanta quanta est
series, neutquam satis est. quidquid intentatur, quidquid
increpat, pro nihilo existimo. difficultatum illecebris ca-
pior: gaudeo periculis terra marique adeundis; pericu-
lis fluminum, periculis latronum, periculis in civitate,
periculis in solitudine, periculis ex hostibus & falsis fra-
tribus. pascar & delectabor fame & siti, vigiliis & jejuniis,
frigore & nuditate, ceterisque ab Apostolo Paulo recen-
sitis, vel dictu asperis, auditu horrendis. Quid enim vero
dici fortius potuit ab exercitatissimo quovis heroe, ignem,
rerum divinarum speculatione & agitatione animi diu-
turna collectum, effundente? Atqui Xaverius sic animum
comparavit, obfirmavit, armavit, ut, etiam per somnum,
tam præsentem, tam inusitatam heroicamque præter ad-
versus ingruentia mala alacritatem. Sic insitum pectori
crucis amorem excoluit, ut vocem quasi naturalem sopi-
tus efferat, indicem paratissimæ ad acerba omnia toleranda
superandaque voluntatis.

Nec verbis inflammatis ardor Xaverii stetit: rebus ipsis
maxime clarissimeque eluxit. Æterni gloriam Numinis,
animarumque salutem unicè assidueque anhelanti, nihil
usquam tam durum & molestum fese obtulit, quin avidis-
simè arripuerit: nec unquam satis amplam desiderio suo
segetem ac materiem ærumnarum offendit. Contume-
liam pro Christo gloriam duxit; dolores in deliciis ha-
buit: Domini calicem amarissimum quo affluentius haurie-
bat, eò sitiebat ardentiùs. Certè in foeda sæaque tem-
pestate, dum alii moerore, ipse gaudio in lacrymas sol-
vebatur; vitæque sua autorem & conservatorem Deum
obsecrabat, ut si huic se periculo ereptum vellet, in alia
majora conjiceret.

Quod si patiendi tam cupidus, tam insatiabilis fuit
Xaverius, quem sibi in agendo modum statuit? aut quid

THAUMATURGUS.

59

in rerum est natura tam arduum, quod non fidentissimè sic aggressus, & suimet & hostium Dei, dæmonum hominumque victor egregius? Licet hic mihi te, Xaveri, Goam Indianum regiam appulsum, vocibus iisdem affari, quibus affatur Magnus & Leo Petrum, Romanam terrarum dominam ineuntem. *Silvam istam frementium bestiarum, & turbulenta profunditatis Oceanum ingredereis.* Fædiores te in terra, quam haec tenus mari, fluctus excipient; procellæ ab improbissimorum hominum importunitate, ab infernorum monstrorum furore sæviūs, quam ab ulla ventorum violentiâ per Atlantici Indicique Oceani decursum concitatæ, neque humanis artibus opibusque superandæ, toto deinceps Oriente jactatum curis infinitis negotiisque operosissimis exercebunt. Jam diversa per Europæ loca Asiaticæ proluseras expeditioni; Lutetiæ, Venetiis, Vicetia, Bononiæ, Romæ, Olyssipone tanquam rudimenta Apostolici munera ita posueras, ut opera ubique pretium faceres. Jam oram Africæ maritimam lustraveras; Mozambique, Melindam, Socotoram, perpetuis frugiferisque in classiarios incolasque laboribus obieras: urbem nunc invehiris vitiorum numero, quam civium frequentiorem. Hic pseudochristianorum tibi labes curandæ, hic ethnitatum superstitiones abolendæ, hic facinorum omnium & flagitiorum purganda colluvio.

Quantum illud opus! quam spissum! quam impeditum! quod industriam certè virtutemque singularem postulet; solertis animosisque viri, aut multorum potius eximiorum virorum vitam occupare queat & consumere. Enimvero quot jampridem homines religiosi, cum Goæ unius ferè pomœrio animum operamque suam inclusissent, tot inveteratis pestilentibusque malis medicinam facere non potuerant; neque Europæos advenas, qui à Christiana sanctitate patriisque institutis spurcissimè degenerarant, ac ferme in Saracenos ethnicosve mores defluxerant, ad officium revocare, nedum gentes ipsas à religione verâ alienas ad Christum convertere & aggregare! Quid? me-

K Serm. I. in Nat. Apost.

Hij

dio in Europæ sinu quotusquisque concionatorum satis efficax invenitur, ut vel tenue oppidum imbuat pietate? Quin creberrimi oratores ne toto quidem seculo plerunque id assequuntur, multitudinis ut animos permutent, solutumque vivendi genus severioribus aliquantò legibus devinciant. Itaque magnum aliquid Xaverius effecisset, tam amplam tamque corruptam civitatem si multorum annorum cultura ad frugem traduxisset. Sin arces etiam Lusitanorum finitimis locis constitutas adiisset, ibique præsidiarios instituisse ac sacramentis procurasset; gnavi sanè piique operarii famam laudemque jure optimo tulisset. At is, ubi Goæ omnia quæ jacebant vitiis prolapsa, excitavit; inter vulnera mentium Christianarum persananda, curationem aggressus infidelium, jam vela pandit ad ultimum Orientem provehendæ Apostolicæ charitati.

Jonas urbem petere Niniven à Deo jussus, refugit; atque etiam profundâ ceti marisque voragine emersus, ardorem solis non sustinet, *zelo interim non secundum scientiam æstuans*; pœnæque imminens civitatis quamlibet poenitentis, animi impatientia mortem ipse sibi imprecatur. At Xaverius, qui prima Divinæ voluntatis per Ignatium, animi sui moderatorem, significatione in alterum orbem evolavit; Oceanum permensus, zonam torridam prætervectus, ac vehementiori cœlestis amoris æstu succensus, interponit se ultiōni quam denuntiat; iræque Domini placandæ intentus, & minis promissisque Divinis compulsâ ad poenitentiam Goâ, tot millium vel partâ vel speratâ salute lœtissimus, vitam devoyet ulteriori & interminatae ad conquisitionem animarum profectioni.

Elias ipse. Elisæusque (ne Prophetas alios commemorem) vix aliquando finibus Israelitarum excessere: ac, sicuti Phœniciae & Syriæ profanas gentes attigerunt, nullam tamen publicam iis procurandis dedisse operam leguntur. Xaverius gentes omnes ardentissimo studio complexus, ubique concionando sacraque cetera obeundo ministeria, Evangelicum regnum ad fines terrarum amplificat. En, urbe Goâ progressus, jam Comorinum tenet,

jam Cocinum pergit, excurrit in Travancoridem, Cambiam occupat, peragrat Ceilanum, Manaram invisit, iusfrat Nagapatanum, Coromandelem trajicit. Labor alius ad alium gradus est. Quid auream Chersonesum, & Malacam loquar? quid Mauricas, Molucasque insulas? Amboinum, Ulaten, Baranuram, Ternaten, Macazarem? Longè alio, quam Carolus ille *Quintus animo, l plus ultra* ferebatur semper; nisi aut necessitatis ratio, aut majoris certè utilitatis, haud prudentem minus, quam fortē vi-
rum & animosum revocaret, atque infinita mari terraq;
itinera releggere, cursus replicare cogeret: five gubernatio Sociorum, & supplementum Evangelicis colonis va-
rias in partes mittendum; five Neophytorum in vexato-
res propugnanda causa, potentium & improborum homi-
num fraus detegenda, vis repellenda. Sed, ut primū
res, quæ viri præsentiam domi, aliisve Christianorum
locis desiderabant, ex munere atque ordine compositæ;
illicò novos recursus instituere, ulterius fidem Christia-
nam in immensum propagare.

Quot ille periculosissimis navigationibus inter scopulos
& turbines, piratasque tempestatibus ipsis naviganti in-
festiores, defungitur! flectit promontoria, syrtes per-
meat, procellas aut frangit aut perrumpit. Quot terrâ
sacras expeditiones, inter hostium prædonumque apertam
insidiosamve grassationem, exequitur! cautes montesque
superat, fluvios torrentesque tranat, pagos urbesque ex-
colit, agris & silvis homines venatur efferatos, undiq;
animarum prædas agit. Cupidius ille ex pietate, quam
olim ex ambitione Alexander, *m Indiam quærebat Indis quoq;
ignoram*. Plures provincias, quam alii vicos, emensus;
hominum plura millia, quam alii capita, Christo lucra-
tus; cum omnibus abunde cumulatéque satisfaceret, nun-
quam sibi satis ipse faciebat. Amplius usquequaque ap-
petit; & præsenti successu animos acuens, longinquis in-

*1 Carolus V. Imperator columnas Herculis, quas præterierat,
in symbolum absumpsit, hisce verbis ornatum; primâ vulgatæ ins-
criptionis parte, quasi metâ sublatâ.*

m Curt. l. 9.

hiat victoriis , crescente exaggerataque per difficultates cum laboribus virtute. Audit insulas eatenus Geographis ignotas , à Lusitanis institoribus deprehensas. dolet scilicet Apostolus , eò priùs terrenarum opum aviditatem & commercium , quām cœlestium pervenisse. Frustra repugnantibus amicis , frustra obnitentibus humani generis hostibus , in Japoniam penetrat : Saxumam , Firandum , Amangucium , Meacum , Bungum , tot alia regna persequitur ; easque demum in regiones , quibus nihil in orbe terrarum longius reperiatur , profert Ecclesiæ imperium. Ut piè gloriari Xaverio liceat , quod vanè jactatum à Pompeio fuerat , quam ultimam provinciam accepisset , eam se medium reddidisse.

Necdum tamen expletus animus est Xaverii. Sinarum vastissimo regno , muris & montibus altissimis circumsepto , severioribusque obstructo legibus & inaccesso , aut irreperere , aut irrumpere , pià religiosaque vel industriâ vel audaciâ conatur. Carissimo Pereriæ , ad tollenda repagula inviúmque regnum Evangelio aperiendum , operam egregiè navanti , & , Lusitani Regis nomine , ad Sinarum Imperatorem adornatâ legatione altius consilium obtegenti , comitem sese Franciscus addixerat , mysticâ n pro Christo legatione fungi paratus. Mox ubi amicum , divinæ tanquam scenæ & Religionis insinuationi splendide servientem , à Malacensi Præfecto per summam indignitatem prohibutum interclusumque videt : tantâ spe dejectus , non ideo propositum aut animum abjicit. Sed aditum sollicitè omni viâ rimatus , in ipso denique procinctu occumbit ; & quidem , ut ignitum virum decuit , igneâ velut morte , febri , & amore magis desiderioque cœlesti confectus. Nec verò extinctus cum vitâ ardor est : adhuc in Epistolis immortalibus verbum ipsius quasi facula ardet , lectorumque pectora Divinæ studio gloriæ incendit. Et Francisci (quod ait Maximus Taurinensis de Laurentio , cuius in æde Xaverius habendis quondam concionibus Romæ sacrosignes sparserat) radiantibus flammis victrix in hunc quoque diem toto orbe Christi coruscat Ecclesia.

n Pro Christo legatione fungimur. II. Corinth. 5.



PARS CAPITIS POSTERIOR.

Sufficit mihi, Domine: tolle animam meam.

III. Reg. C. XIX.

HICCINE est Magnus Elias ille, qui surrexit quæ
ignis? cui elemento, Salomone ipsaque experientia
teste, satietas nunquam, verùm tacita quodammodo
vox, amplius, conveniat. Sæpe nimirum obruitur ignis:
atque interdum, etsi vivat valeatque, improbam ta-
men contumacemque abortus materiem, languescere vi-
detur & vinci, quod tardè laboriosèque vincat. Refri-
xisse, atque adeo congelasse Prophetam dixeris, illum,
illum, qui modò tantum exhibuerit ardorem animi, Regem
Achabum populumque congregatum acriter increpans;
ac subinde post ignem cœlo devocatum, tot Baalis pseu-
doprophetarum cæde calens, ante regios currus accin-
ctus procurrerit, ipso quem excierat, nimbo propè con-
citator. nunc unius impotentis fœminæ terrore percul-
sum videas, humiq; prostratum; simul audias mortem à Deo
suppliciter expetentem. Sic se res habet: maximos ali-
quando viros sibi relinquit Deus, & humani quid pati sinit,
ut agnoscant se homines, néve Divinis ornati muneribus
efferantur, imbecillitatis propriæ consci: cùm, alacres
priùs effervescentesque agente Domini spiritu, postmo-
dum isto cessante afflati torpentes, remisso fractoque im-
petu consenescant.

At verò non eodem ex animi sensu, quo Eliæ, Xaverii
prorupit huic præfixa capiti vox altera, **SATIS EST DOMINE;**
theba

haud semel illa, nec uno loco emissā. Non tædio, non metu
cooriebatur hujuscemodi exclamatio; sed contrā liquef-
cente piis cœlestibusque deliciis animo, neque vim tantam
largissimè suavissimèque influentis Domini capiente. Quan-
quam simile nonnihil fugæ, angorique Eliæ, Xaverio
contigit: quod ipsum non culpæ, non dedecori vertendum,
sed in laude Francisci ponendum. Ægritudinem animi
& moestitiam persensit haud raro vir Apostolicus, dum
cerneret Evangelii progressioni obstantes, quos minimè
decebat, acceptisque ab omnipotente Deo & pio Lusi-
taniæ Rege mineribus abutentes in utriusque injuriam
Præfectos ac Magistratus. id quod aliquoties vir sanctus
in epistolis suis dolentissimè conqueritur. Quoties, inter
molestissima Divinæ messis colligendæ impedimenta, ge-
mitus illos usurpavit Davidicos! *Tabescere me fecit zelus
meus.* Neque expers istius doloris Paulus fuit, sed vel ma-
ximè tali piorum amantium sensu affectus: prout ipsemēt,
epistolâ ad Corinthios posteriori, cetera ut fileam testi-
monia, profitetur. *Non enim volumus ignorare vos, fratres,*
de tribulatione nostra, quæ facta est in Asia; quoniam supra
modum gravati sumus, supra virtutem, ita ut tæderet nos
etiam vivere &c.

Enimverò æternitatis illi satores, quos magnificè vocat Hi-
larius, vitam sibi acerbam, & quavis morte graviorem sen-
tiunt, ubi Religionis Christianæ cursus vel abrumpitur,
vel retardatur. Quantus ergo Xaverii pectus dolor ef-
fodit, cùm Sinica Legatio, de quâ sub finem prioris par-
tis memoravi, in tantam proventus Evangelici spem, salu-
tisque imperio amplissimo pariendæ, suscepta, per dirum
nefas interversa oppressaque fuit, & ab eo quidem homi-
ne, de quo ipse optimè promeritus Xaverius fuerat, cùm
alias persæpe, tum recens ab Indianum Prorege eidem
impetratâ maritimâ præfectura! quam potestatem, usu
primo juris iniquissimo, in autorem ipsum beneficij con-
vertit, homo peræque in Deum impius, atque in Francis-
cum ingratus. Tulit hic (quæ viri sanctitas erat) præ-
clara spectabilique lenitate animi, tam indignam, tam
atrocem injuriam, quaque nulla acerbior unquam sibi ac-
ciderat

ciderat. neque, ut Elias, petivit animæ suæ, ut moreretur; sed vitam in usus rei Christianæ, mirâ patientiâ, mirâ Divinæ voluntati submissione reservavit.

Hæc adeo causa viro alioquin Martyrii appetentissimo fuit, cur Eliæ nonnunquam fugientis exemplum sequeretur. Neque verò fortitudini repugnat fuga, quam prudenter, quam charitas imperarit. Quin Deo acceptior est, quæ tuendæ ipsius augendæque gloriæ serviat, capitis sui conservatio, quam sanguinis profusio. & aureolæ martyrii, quam publicæ utilitati posthabueris, clariùs aliquomodo enitescat, suam martyrii cupiditatem vincens, ac de se ipso triumphantis animi palma verè lemniscata. Magnus Athanasius, in Apologia de fuga sua, exponit à Mose Dei jussu constitutas urbes refugii; à Christo discipulis indictam persequentium fugam; ab ipso vitæ mortisq; Domino, qui fugâ puerum se in Ægyptum deportari voluerat, jam miraculorum vi gloriaque spectato, jam morbos dæmonasque fugante, recessus tamen delectos & latebras, quibus hostiles impetus ad certum præfinitumque arbitrio suo tempus eluderet. Non indignum putavit, cum quereretur, abscondere se; & cum persecutionem paterneretur, fugere & insidias declinare. Quo scilicet facto præceptum salubre confirmaret, sanctæque disciplinæ sectatoribus formam ostenderet cedendi inimicorum furori. ut observat doctus ille pariter ac fortis, & in ipsa fuga invictus fidei propugnator.

Xaverius igitur, qui toties capitis periculis ultro fese objecerat, cum nihil in vita morte haberet optatius & martyrii laureâ; idem heroicam fortitudinem sapientiâ & charitate sic temperavit, ut subduceret interdum se barbarorum insectationi, cum animadverteret plurimarum gentium salutem suâ unius vitâ contineri. Sedit fugitus Elias subter juniperum: ad necem à Saracenis conquisitus Franciscus arbore consensâ delituit. Aliás Mauricensium lapidatione petitus, ac pœnè obrutus, apertè fugit: sed quantam in media fuga vim probavit! Obstabat currenti trabs immanis, ad oram fluvii; quam molem multorum simul hominum contenta molitio ægrè

loco movisset. Hanc manu correptam Xaverius levissimè impellit, ac trabem veluti arundinem in altum projicit; projectamque insiliens, & quasi cymbam expeditam agens, repente in adversam latissimi fluminis ripam evadit, stupore defixa turbâ seditiosorum, & novo spectaculi genere conterritâ. An verò mirabilior Franciscus extitisset, amnem si convoluto pallio, ut Elias, ut Elisaeus, discidisset; aut, quemadmodum Franciscus alter, Paulanus, instrato pallio aquas ambulasset?

Itaque non imbecillitatis fuit, non timoris, quod Xaverius fugit, viribus humanis superior; & qui passim liberrimâ acerrimâque superstitionis ac vitiorum censurâ, commentitorum numinum disturbandis simulacris, exurendis fanis, iram turbulentæ multitudinis, principum impiorum furorem lacefferet. Ivit in adversa, intentaque Badagarum tela; Javarorum, venena hospitibus miscere, sicas vibrare solitorum, perfidiam & crudelitatem invasit; obtulit se Japoniorum tyrannorum & populorum immanitati, Brachmanum & Bonziorum atrocitatî. Denique ad Sinarum carceres & vincula, externis regnum ingredi ausis proposita, ad præsentissimam & acerbissimam necem votis omnibus adspiravit. *Majores divitias estimans thesauro Sinarum, ut quondam Moses, Aegyptiorum, improperiū Christi; quanquam aspiciebat in remunerationem, velut idem clarissimus Testamenti veteris Propheta; amore tamen primùm ac potissimum Divino ardenter opprobria tormentaque, sic tanquam speciosa Domini suavissimi insignia o desiderabat, præclare consentiens, votisq; conspirans cum eo, quem patrem animæ suæ appellabat, Ignatio.* Quàm crebrò id Xaverius, quàm enixè Dominum precatus est! *Tolle animam meam, quod unum sibi sufficeret.*

Næ ille gratius omnium dono miraculorum habeat, si tandem aliquando fuerit concessum, ut quam legem tot usu linguarum promulgavit, sanguine toto obsignet. Et quidem istius generosi sanguinis partem misit voluntariis

o ut Christi vestes & insignia, piis religiosisque viris ardenter optandas scripsit D. Ignatius contumelias etc.

pœnis, flagellisque asperrimis frequentissimè; nec semel ab hostibus Christiani nominis acceptis vulneribus; faxis, fustibus, sagittis, flammis appetitus passim, & tantum non absimus. Nec unquam inter adversa Francisco excidit hujuscemodi vox, *satis est*: sed quasi illecebrâ perpessione captus, medias inter vexationes abundans gaudio, quod esset pro nomine JESU dignatus afflictione & contumeliâ, triumphabat. Quamvis, instar Apostoli Pauli, distractus pœnitusque desiderio cernendi fruendique in cœlesti patria Christi; laboriosam tamen in exilio jactationem felicissimæ quieti anteponebat, publici commodi ratione, & ipsius, cui nequum omnia videret subjecta, Domini charitate.

Atenim Deo cedendum, qui liberali se magnificaque vinci voluntate haudquaquam patitur; & famulo acerbitates avidissimè haurienti, flagrantissimè sitienti, infundit liquidissimas suavitates, omnemque planè sensum ac mortalitatem exuperantes delicias. Talem benignissimi Domini largitatem expertus creberrimè fuit pro suo merito Xaverius, nominatim in ora Piscaria, in Maurica insula, in ultimâ Japonia: quas ipse, cum scribebat ad socios, aptissimas esse regiones præ dulcissima lacrymarum vi perdendis oculis testabatur. *In terra horroris*, prorsus humano solatio destitutus, inter gravissima incommoda, versari in coelo beatus videbatur.

Ea verò cœlestis lœtitiae vox; *Satis est, Domine, satis est;* Goæ præsertim excepta fuit; ubi, exemplo Christi, pernoctabat in oratione Franciscus. observatus nonnunquam à domesticis est; dum captans remotum ab arbitris locum, liberumque cœli conspectum, sacras inter ædicas in horto inambularet, animo ex corpore eminens, totus à Deo suspensus, in cœlum defixis oculis, vultu incenso, diductâ à sinu tunicâ; prodens concalentis intra se cordis jucundissimum laborem, ex ardente per altissimam meditationem igni, inundante consolationibus Deo. Jamtum videlicet inebriabatur ab ubertate domus Divinæ, & tor-

rente voluptatis purissimæ potabatur. *Satis est Domine;*
clamitabat, satis est. Pone modum largitati tuæ; parçe
 angustiæ pectoris mei. Obruor, liquefco, deficio. Sustine
 irruentes in animum jam submersum delicias. aut si tantâ
 pergis me dignari suavitatis copiâ, *tolle animam meam;*
 transfer in *hortum sempiternæ voluptatis*, in superam Hie-
 rosolymam, quam procedentis à folio tuo fluminis, vivi,
 perennis, impetus lætificat.

O mirificum certaminis, Deum inter & hominem, ge-
 nus; quo cœlesti beneficentiæ sanctarumque largitioni de-
 liciarum repugnat homo, labores ærumnasque provocat:
 hominem Deus acerba evocantem suavissimis donis cumu-
 lat & obruit! Jamque mutatae sunt vices; ut Xaverio mo-
 lestias amplius & dolores appetenti reponat, sufficit mihi
 tam prolixa, tam excelsa, piéque avida ferendorum ma-
 lorum voluntas: sat esse gaudiorum succlamanti, amplius
 ingerat defæcatæ inexhaustæque suavitatis. Quin & Xa-
 verius intelligens arbitri rerum supremi voluntatem, ut
 legitimo longissimoque emenso curriculo, sub ipsum emo-
 riatur imperii Sinici aditum; demissè reverenterque ac-
 quiescit Divinæ legi; & sufficit mihi, Domine; *tolle animam*
meam; voce intermortuâ, sed vivo immortalique amore
 suspirans, conversis collatisq; omnibus in æternam patriam
 desideriis anhelans, illam demum Vatis Regii sententiam
 beatissimâ experientiâ comprobavit; *satiabor, cum apparuerit*
gloria tua.

Hactenus de Xaverii gemina voce, quæ cœlestis extitit
 animi perfectæque virtutis index certissima, humanis cas-
 bus interritæ, rebusque asperrimis inexpletæ: Divinis
 contemplationibus exercitæ, verissimisque deliciis satiatæ.
 Qua tractatione si fortè modum videar excessisse commen-
 tariorum; habeo mecum facientes locis operum variis
 sanctos Patres. ac, ne dissimulem, ipsa materiæ benigni-
 tate captus, sensimque proiectus, nec tamen inconsideratè,
 specimen edidi, quid fieri in hoc argumento possit. Reli-
 qua deinceps capita brevius exequar: quod & forsitan
 oportet; & certè, quoniam me tempus deficit, opus est.